

AKASHVANI AIZAWL
REGIONAL NEWS BULLETIN
(MIDDAY)



R-DAY

Mizoram sorkar chuan naktuka Republic Day lawmna-ah a tam thei ang ber tel turin mipui a sawm

Republic Day vawi 77-na chu ram chhung hmun dang rualin nakgtuk hian Aizawl ah pawh Lammualah lawmna hun hman a ni dawn a. Larsap Gen. VK Singh chu he hunah hian khuallian a ni ang.

Lammual-a Republic Day lawmna hizing dar ah 9 ah tan a ni ang a Khuallian in Hnam Puanzar a pawhparh hnuah Parade Contingent enfiahna neiin, Republic Day pual lawmna March-Past in a chhunzawm ang. Governor hnen atang hian Republic Day thuchah ngaihthlak a ni ang a. National/State Award leh chawimawina dangte semin a chhunzawm ang. Hemi hnu hian sawm bikte tan Lok Bhavan-ah Governor's At Home buatsaih a ni ang.

He tih lai hian Aizawl Lammual a Republic Day lawmna turah venhimna khauh taka ruahman a ni a. Aizawl district SP Pu Zosangliana'n Akashvani News Aizawl a hrilh danin sorkar hmun pawimawhah te uluk leh zuala venhimna kalpui a ni a, in chhawng sang te ngaihven zual bik niin Lammual leh Lok Bhavan chung zawnah drone thlawhtir khap a ni a. Lammual chhungah bomb kam ruk a awm leh awm loh pawh bomb senghawi thiamte'n uluk takin an enfiah reng ani. Boruak muanawm tak hnuai a Republic Day lawmna kalpui a nih theih na'n Police te pawh ngawrh takin an duty a ni. Tun dinhmunah Aizawl a Republic Day lawmna tibuai thei tur boruak engmah a awm thu hriat a ni lo ani.



KTP CONF

Mizoram Presbyterian Kohhran te chuan Pastor bial hrang hrangah Kristan Thalai Pawl, KTP Conference an hmang mek a, zanin hian a tiak ang.

Khhawmpui hi zirtawpni zan khan tanin Palai lawmna leh report inkhawm neih a ni a, nimin Inrinni nilengin Rorel leh hruaitu thar thlan a ni a, nizan atang khan Pathian biak inkhawm awm chhunzawmin zanin hian a tiak ang.

Bial Conference hman dan tur hi Bial committee-in ngaihtuahin a remchan dan anga hman thin a nih avangin bial hrang hranga conference hman dan pawh a inang vek lo a, Bial thenkhatah thupui thlan bik neiin speaker ten an sawi thin a, bial thenkhatah chuan thupui thlan bik pawh nei lovin bial hruaituten an in sawi chhawk chang pawh a awm thin a,a remchan dan anga hman thin a ni. Minister Pu Lalnghinglova Hmar

chu Tanhril Bial KTP Conference, Tanhril Kohhranah Speaker a ni a, thupui "Tunlai thil awmzia" tih hmangin Inrinni zan atang khan thu a sawi a ni.

Kumin hian chhan engemaw avanga a huna hmang thei lo tur bial thenkhat an awm a. Central KTP hruaitute chuan bial hrang hrangah inkhawmpui hi an hmanpui a ni. Report hnahnung bera a lan danin tun dinhmunah Bial 223 awmin Branch 907 a awm mek a, KTP member 1,77,548 (mipa 1,07535 leh hmeichhia 70,013) an awm mek a ni.



PYD CONF

Mizoram UPC thalai Pentecostal Youth Department (PYD) North Mizoram District huam chhung Bial 31 leh Aizawl East District hnuaia Bial hrang hrangte chuan PYD Inkhawmpui an hmang mek.

Conference hmangtute hian Zirtawp zan kha thlenkim zanah hmangin, nimin khan conference rorel an nei a,nizan atanga zanin thleng Revival Programme-a hun hmangin zanin hian inkhawmpui hi a tiak ang.

Bial PYD Inkhawmpuiah hian thupui hranpa leh Speaker hranpa nei an awm laiin Bial thenkhatah chuan thupui hranpa nei lovin Bial hruaitute leh Bialtu Pastor te hnen atangin thusawi ngaihthlak thin a ni a. District PYD hruaituten bial hrang hrangah an hmanpui a ni.



VOTERS' DAY

Lunglei District Election Officer (DEO) Pi Navneet Mann hovin zirtawp ni khan a hna thawh pindanah National Voters' Day (NVD) vawi 16-na pualin hun hman a ni.

Pi Navneet Mann chuan kal khawmte chu NVD vawi 16-na chibai bukin, duhthlanna thiang tak nena mahni ai-awh thlan theih chu chanvo hlu tak a nih angin India ram mipui rorelna vawn nun kawnga thawktu nih tum theuh turin a chah a. Kuminah ram pumah electoral roll endik runpui ngawrh taka kalpui a ni dawn tih sawiin, electoral roll dik, felfai leh thianghlim tak a awm theih na'na thawktute thawhpui turin political party hrang hrangte a sawm bawk ani.

He hunah hian Election Officer Pi Lalhruaitluangin roll endik runpui, Special Intensive Revision (SIR) kalpui dan tur tlangpui a sawi fiah a. SIR hnahnung ber chu kum 2005 kuma mi kha a nih tawh thu sawiin, kum tin a pangngai-in roll endik chu kalpui reng ni mah se, ngawrh leh uluk zawka SIR kalpuina chu kum 20 lai a liam tawh avangin siam that ngai tam tak a awm tawh a rinawm thu a sawi a. Electoral roll dik lo palh chhui chhuak turin in tinah luta endik tur a nih thu te, form dah khah leh lehkha pawimawh thil tel a ngaih tur thu te sawiin, political party, tlawmngai pawl leh mipuite chu tha taka Booth Level Officer (BLO)-te lo thawhpui a, lo tawiawm turin a chah ani.

He hunah hian sawrkar official-te, political party leh tlawmngai pawl ai awhte an tel a. Kal khawmte'n NVD thutiam an chham rual bawk.



MANN KI BAAT

Prime Minister Narendra Modi-a’n industry leh Start-Up sumdawnna nena inkungkaihna nei, ram mipui, a bikin thalaite chu thil tha leh tlo ngaipawimawh turin a ngen. Vawiin Akashvani-a Mann Ki Baat hun a hmanna-ah he thu hi sawiin ei leh bar lamah India-in chak takin hma a sawn zel a, India-ah khawvel mit a fu mek a ni, a ti.

Naktukah Republic Day lawmna, ram pumah neih a ni dawn tih sawiin he ni hi ram Danpui hman tan ni a ni, a ti a, Danpui duangtute, zahna leh chawimawina hlanna hun a ni, a ti.

